

20  
21

# ISLA ((•)) ONLINE

Diahuebs 16 December 2021

Email: [IslaOnline@gobierno.aw](mailto:IslaOnline@gobierno.aw) Tel: 528-4952

Aruba mester di  
nos TUR!



Gabinete Wever - Croes II







# MOCION ENTREGA PA PARLAMENTARIO KAMPERVEEN TA UNO SUMAMENTE IMPORTANTE Y TA RESUMI TUR LOCUAL A WORDO DISCUTI E DOS DIANAN DEN PARLAMENTO



Prome Minister Evelyn Wever - Croes durante reunion di Parlamento cu a tuma luga e siman aki riba e tema di acuerdo firma entre WEB y Eagle LNG, a splica cu e mocion entrega pa Parlamentario Kamperveen ta uno sumamente importante y ta un mocion cu ta resumi tur locual a wordo discuti e dos dianan den Parlamento.

Premier Wever - Croes a splica cu primeramente e mocion ta pidi pa Minister encarga busca un manera pa haya e contract firma pa LNG, sinembargo Minister Glenbert Croes ainda no por a duna Parlamento e contract pero lo busca manera pa haci esaki.

"Como Prome Minister mi ta haya cu ta importante pa si kier algo como Parlamentario, no forsa e Minister pa kibra ley, enbes busca un manera pa haya e claridad y transparencia cu ta desea. Nos ta respeta cu Parlamento kier transparencia y nos kier pa Parlamento exige transparencia tambe"

E di dos punto den e mocion ta trata 'hydrogen'. E peticion ta pa accelera esaki y bin cu un proyecto piloto. Cual definitivamente por wordo haci segun Prome Minister.

Pa locual ta e di tres y di cuatro punto den e mocion, esakinan ta encera 'corporate governance structure'. Pa cual Premier Wever - Croes a splica cu e tambe a sinti den e dos dianan di reunion cu Parlamento tin deseo di tin mas control den companianan estatal, cual lamentablemente no ta asina aworaki.

E peticion ta pa haci un estudio y mira con por duna Parlamento mas 'tools' pa Parlamento por controla (considerando e hecho cu Gobierno ta un share holder) den un compania estatal, vooral ora ta trata inversionnan di termino largo.

Pa finalisa e reaccion di Premier Wever - Croes riba e mocion aki, a enfatisa cu ta di acuerdo cu locual a keda presenta y ta puntonan cu ta desea tambe.



## Prome Minister Evelyn Wever-Croes: **DIABIerna CONSEHO DI MINISTER DI REINO LO TRATA RECORTE DI SALARIO Y SOSTEN DI LIKIDES**



Durante e reunion den Parlamento diaranson pa trata e Presupuesto Supletorio, Prome Minister Evelyn Wever-Croes a informa di e status di negociacionnan cu Hulanda pa loke ta trata recorte di salario y sosten di likides.

Prome Minister a duna di conoce cu Gobierno di Aruba ta den pleno negociacion cu Hulanda. Diabierna 17 di December lo tuma luga e Consejo di Minister di Reino cu ta uno hopi importante pa Gobierno di Aruba.

Den e reunion aki lo trata e sosten di likides pa Aruba pa e prome kwartaal di 2022. Tambe e ta un reunion importante pasobra ta bay atende cu e peticion pa 'bouw af' recorten na riba salario di empleadonan publico y semi-publico.

"E peticion ta pa bouw af, dus no mantene na e nivel ey pero bahe te pa por yega normalidad", Prome Minister a indica.

Prome Minister a expresa cu e negociacionnan no ta facil. Dialuna ultimo a hiba conbersacionnan extenso riba e COHO, e nota di cambio, e nader rapport. Tur ta riba mesa di deliberacion cu Hulanda.

"Gobierno di Aruba ta optimismo cu e Consejo di Minister di

diabierna. Algo por cambia di un momento pa otro pero nos ta na mesa ainda. E tema di e protocol ta riba mesa y ainda nos no a sali afor cu un fecha final pa nos por yega toch na e sosten di likides".

Gobierno di Aruba a haci un peticion di sosten di likides di aproximadamente 80 miyon di cual un 30 miyon ta debe cu mester wordo paga. Esey no tin discucion riba dje, Prome Minister a bisa, pasobra tin palabracionnan haci cu Hulanda.

Ta resta un componente di 50 miyon cu tin mester den e prome kwartaal pa paga gastonan di Gobierno pasobra entradanan no ta mes halto cu gastonan ainda den e prome kwartaal di aña. E 50 miyon aki ta pa paga salario, percura pa enseñansa, nos sistema huridico y di salud y pa gobernacion en general.

Prome Minister a duna di conoce cu riba e 50 miyon, CFT ta conseha pa duna 12 miyon y no 50 miyon. CFT ta propone pa bin cu algun medida di impuesto, otro cortamento pa asina por yega na e diferencia pa yega e 50 miyon.

"Dus nos ta eynan ainda. Punto di salida di Gobierno ta cu nos ta sinta na mesa pa negocia pa asina yega na un meta comun", Prome Minister Evelyn Wever-Croes a enfatisa.

# Prome Minister Evelyn Wever-Croes: GABINETE WEVER-CROES TA OPTIMISMO CU AÑA 2022 LO TA UN MIHO AÑA

**Den union cu Pueblo di Aruba pa un meta comun, nos ta logra**



“Nos ta drentando un aña nobo cu hopi optimism”, asina Prome Minister Evelyn Wever-Croes a expresa durante su disertacion den reunion na Parlamento pa trata Presupuesto Supletorio diaranson ultimo. Cada Minister di Gabinete Wever-Croes II lo traha pa hiba nos pais den recuperacion den union cu pueblo di Aruba.

Minister Geoffrey Wever ta encarga cu desaroyo economico. Crecemento economico ta bay ta e yabi di exito di nos pais. Crecemento economico ta bay crea cupo di empleo y divisas pa nos por paga nos debenan bek pa Aruba ta para riba su propio forsa. Nos tin un maneho, nos tin sectornan prometedores, aworaki nos ta trahando pa accelera procesonan, baha burocracia y red tape pa asina nos no spanta pero atrae inversionistanan. Pa asina nos propio localnan por inverti den lo cual nos tin mester aki na Aruba. E no ta Minister Geoffrey su responsabilidad so pero algo cu nos ta haci conhunto.

Minister Dangui Oduber cu ta encarga cu e pilar economico mas importante. Tur estudio cu a wordo haci ta bisa cu turismo lo sigui ta e pilar economico pa e siguiente añanan, termino corto en todo caso te ora nos caba di desaroya otro sector. Sector turistico ta bayendo miho. E luna aki nos tin mas cantidad di turista cu nos tabata tin prome cu pandemia pe luna aki. Pa e aña aki nos ta cera cu e recuperacion di turismo cu 73% compara cu 2019. E no ta 100% ainda pero 73% ta hopi bon. Minister Dangui tambe ta encarga cu e cartera di

salubridad, e ehecucion y maneho pa loke ta trata salubridad y covid. Ban percura pa nos cuida pa nos no haya mas ola di Covid pasobra esey lo tira nos bek atras y stroba e desaroyo.

Xiomara Maduro encarga cu e cartera di financien ta manera e watchdog financiero riba tur hende pa asina percura pa e entradanan subi y gastonan baha constantemente. E ta esun cu mester wak con ta balansa tur cos. Un trabou grandi a wordo haci specialmente durante pandemia. Pa aña 2022 sigur importante pa percura cu e ta bon aña.

Minister Ursell Arends, cu tin den su encargo transporte y medio ambiente cu ta hopi importante pasobra nos ta papia di desaroyo pero no por desaroya un pais sin tene cuenta cu proteccion di naturalesa. Pa un motibo hopi explicito, nos a dicidi cu medio ambiente no ta keda mas parti di e cartera di infraestructura paso no ta tur ora e ta haya e mesun atencion eyden. Nos a sake pasobra nos mester e balance entre desaroyo economico y proteccion y conservacion di nos naturalesa. Minister Ursell tambe tin e cartera di integridad cu nos ta papia cada biaha di dje pasobra falta di integridad ta stroba bo desaroyo. Adultonan mayor ta un di e gruponan cu a wordo mas fuerte afecta pa e pandemia. E pandemia a afecta nos tur pero e gruponan mas vulnerabel a wordo afecta cu ta den e grupo ey. Adultonan mayor mester keda parti di desaroyo y tin un rol tambe pa nan fungi den e desaroyo nobo aki cu nos a crea despues di pandemia.



## Continuacion GABINETE WEVER-CROES TA OPTIMISMO CU AÑA 2022....

Minister Rocco Tjon, cartera di husticia cu ta hopi importante tambe pa nos desaroyo. Aruba ta atrae turista y inversionista pa cua ta importante e sistema di siguridad cu nos tin. Esey ta atrae hendenan bin Aruba. E cartera social ta bay bira mas importante cu nunca. Den e cartera aki a inclui tambe salud mental pasobra nos sa cu nos ta den un crisis social y p'esey a bin cu e Sociaal Crisis Plan. Aworaki mi ta gradici Parlamento pa sostene e proposicion di Minister pa continua cu e plan aki. Mi ta poco decepciona den Parlamantaronan cu no ta sostene e Sociaal Crisis Plan. Mi ta kere hasta berguensa mi tin. Bo no por desaroya un pais cu klinker y asphalt so, esey ta maneho di Gabinete Eman, e ser humano a wordo lubida. Bo ta desaroya un pais ora e ser humano ta desaroya huno cu e pais.

Minister Glenbert Croes cu e cartera di energia cu ta un parti hopi importante di desaroyo economico pero tambe labor. E cartera cu Minister Glenbert ta trahando riba dje no ta pa just bisa cu economia a crece, e ta un medio pa bo yega na bo

destino cu ta crea cupo di empleo pa mama y tatanan di famia pa nan tin un trabou digno cu sueldo digno y proteccion na pia di trabou. Esaki ta responsabilidad cu Minister Glenbert lo bay traha mas riba dje.

Minister Endy Croes encarga cu enseñansa y deporte. Tur hende den e field di enseñansa sa cu esey ta e yabi si bo kier desaroya bo pais di berdad. Y nos sa cu nos tin hopi trabou pa haci eyan. Nos sa cu nos tin cu haal in un retraso, crea bek un confianza den e veld di enseñansa y mi ta kere cu Minister ta haciendo un bon trabou demostrando cu e ta purba soluciona e problemanan cu tin y logra cu tin desaroyo.

Cu tur esaki 2022 ta bay ta un aña prometedor, un aña cu nos por tin hopi speranza. Pero e no ta bin di su mes, e ta bay pasa si nos tur uni y para tras di un meta comun, Aruba y su hendenan, asina so nos lo logra", Prome Minister Evelyn Wever-Croes a termina bisando.

## **Prome Minister Evelyn Wever-Croes: E esfuerzo y dedicacion di Gabinete Wever-Croes II ta logra cu ENTRADANAN TA 13 MIYON FLORIN MAS HALTO CU LOKE A PREMIRA Y GASTONAN 184 MIYON FLORIN MAS ABOU CU LOKE A PREMIRA**

Durante e reunion publico den Parlamento pa trata e Presupuesto Supletorio diaranson ultimo, Prome Minister Evelyn Wever-Croes a enfatisa cu Gobierno y pueblo di Aruba ta habiendo un aña cu optimism cu 2022 lo ta un miho aña compara cu 2021.

Den e reunion di Presupuesto Supletorio a trata un cambio den e presupuesto. Den e presupuesto cu a wordo entrega, trata y aproba den Parlamento, e deficit cu Gobierno a premira tabata 775 miyon florin causa pa Covid-19. Prome Minister Evelyn Wever-Croes a enfatisa cu desde cu e presupuesto a wordo aproba, Gobierno a sigui haci esfuersonan tur dia pa hisa e entradanan y baha e gastonan.

Cu hopi esfuerzo y dedicacion, Gobierno a logra cu entradanan a sali na fin di aña 13 miyon florin mas halto cu loke a premira y gastonan 184 miyon florin mas abou cu loke a premira. Esaki mas e otro cambionan cu tin, ta duna cu e deficit ta baha cu casi 190 miyon florin. Asina mes, Prome Minister a remarca, e ta hopi halto. E deficit ta na 586 miyon florin aworaki cua ta



representa mas o menos 11% di nos GDP.

Sinembargo, Prome Minister a duna di conoce, Gobierno ta habiendo un aña nobo cu hopi optimismo. Cada minister di Gabinete Wever-Croes II, lo duna di nan parti pa nos percura pa aña 2022 lo ta un miho aña compara cu 2021.



# Prome Minister Evelyn Wever-Croes : **PROME MINISTER TAWATA PRESENTE NA PRESENTACION DI SPREEKBEURT 'PROFESION DI BO SOÑO' DI SILAINY CROES NA COLEGIO BON BINI**



Diahuebs 16, Alumno di klas 5 di Colegio Bon Bini, Silainy Croes, a tene un spreekbeurt di e profesion di su soño cu ta pa bira Minister President. Pa esaki, Silainy a invita Prome Minister Evelyn Wever-Croes na su presentacion.

Silainy a prepara su spreekbeurt den un bunita Powerpoint Presentation y tawata hopi bon prepara. Prome Minister a keda hopi encanta cu e preguntanan cu Silainy a puntre y tur a haya un contesta.

Durante su bishita na e scol, Prome Minister a keda hopi contento di mira cu e scol ta hopi bunita manteni y tin un animo hopi bunita na e scol y pa esaki, Premier ta gradici inmensamente hopi e diregencia y tur e docentenan.

Prome Minister a tuma e oportunidad tambe pa desea alumnonan y docentenan un bon vakantie y cu nan por descansa y recarga pa bin beki otro aña yen di energia nobo.


"Mi ta kere cu e iniciativa aki di laga muchanan scoge nan profesion di nan soño y entrevista esnan cu tin e profesion aki, ta un estímulo enorme pa nos muchanan. E ta inspira nan tambe. Talves no ta esaki ta bay bira nan profesion di futuro



pero semper ta bon pa tin un soño unda bo kier yega pasobra bo ta yega un caminda hopi leu e ora. Pabien na Colegio Bon Bini.

Prome Minister ta gradici Silainy pa e honor y ta felicite pa su 10 cu el a haya pa su spreekbeurt.





## Minister di Cultura:


# GRUPO DI ACROBACIA RCC ARUBA TA COSECHANDO HOPI EXITO NA HUNGRIA

## Promoviendo Pais Aruba internacionalmente

Minister Xiomara Maduro ta informa cu e grupo di acrobaatnan Ritmo Cubano Company-RCC Aruba, ta participando desde luna di october den un tour cu lo dura te 31 di december 2021 na Budapest, Hungria. E grupo aki ta consisti di miembronan di varios nacionalidad Cubano, Venezolano, Colombiano y Arubano. RCC Aruba ta representando Pais Aruba durante di nan tour y ta carga nomber di nos Pais cu hopi orguyo. E grupo di acrobaatnan lo participa na un competencia internacional di acrobacia cu lo tuma luga diana 12 te cu 17 di Januari 2022 na Budapest, representando Pais Aruba. Pa por a participa na e tour, RCC Aruba mester a participa den un competencia internacional di mas cu 100 artista y e Grupo di acrobacia a gana saliendo den e top 3.

Durante di e tour na Hungria, e artistanan ta trahando cu e miho artistanan di acrobacia na mundo, manera artistanan di Etopia, Africa, trapetistanan di Rusia, grupo di ballet di Budapest, 'unicycle' di Spaña, 'handbalancer' y 'jugglers' di Cuba, Mexico, Ucrania y Italia. E hoben artistanan aki ta bibando un experiencia hopi bunita y ta hopi orguyoso con e publico Europeo ta aprecia nan talento y arte. E Secretario di Estado encarga cu Cultura di e Ministerio di Recurso Humano di Hungria, sr. Peter Fekete, cu ta e director di e 'Capital of Circus Budapest' a presencia nan show varios biaha y a keda encanta cu nan talento y a felicitanan pa nan tremendo show.

Diego Jaramillo, Director di RCC Aruba ta bisa cu e meta di e compania ta pa aporta na cultura y turismo di Pais Aruba. Na Aruba nan ta traha na Paseo Herencia Mall y tambe den diferente hotel, unda e turistanan ta disfruta di nan shownan. Na momento cu nan ta riba tour y participa na festivalnan internacionalmente, nan ta orguyoso di por promove Pais Aruba.






## Continuacion GRUPO DI ACROBACIA RCC ARUBA TA COSECHANDO HOPI EXITO....

Sr. Jaramillo ta continua bisando: "Na Budapest, tur hende ta yama nos 'Aruba', algo cu ta hacinan hopi contento y orguyoso. E hungaro no a tende nunca di Pais Aruba y ora nan ta bay busca Aruba online, nan ta bin conta nos con encanta nan a keda di wak con bunita Aruba ta". Locual mas e acrobatistanan ta scucha ta "You live in a paradise, you guys are lucky".

Minister di Cultura ta sumamente orguyoso y ta balora e tremendo trabou cu e hoben artistanan aki ta haci tanto local y internacionalmente. Minister Xiomara ta gradici RCC Aruba pa nan aporte cu nan ta duna na nos cultura y e gran promocion cu e artistanan aki ta duna Pais Aruba internacionalmente. Un danki di curason na sr. Diego Emilio Garzon Sierra, sr. Juan

Camilo Aguillon, sr. Jhon Freddys Badillo, sr. Juan Felipe Marin Rios y na e directornan sr. Diego Jaramillo Ospina y sra. Yamila Hernandez Ramirez.

Pais Aruba ta orguyoso di RCC Aruba pa e tremendo trabou cu e artistanan aki ta haci internacionalmente y ta desea nan hopi exito den e competencia internacional cu lo tuma luga na januari 2022 na Budapest.



## DEPARTAMENTO DI ADUANA TA PARTICIPA NAN ORARIONAN DI OFICINA DURANTE DIANAN DI FIESTA

-Dianan di fiesta a acerca. Cu esaki Departamento di Aduana ta pidi comunidad di Aruba pa tene cuenta cu nan orarionan di oficina:

- Diabierna 24 di december 2021 e ofcinanan di Aduana lo ta cera en conexion cu ATV dag obligatorio di gobierno.

Tur servicio pa clientenan y publico en general lo reanuda riba dialuna 27 december 2021.

- Diabierna 31 di december 2021 e ofcinanan di Aduana lo ta cera en conexion cu ATV dag obligatorio di gobierno.


Tur servicio pa clientenan y publico en general lo reanuda riba dialuna 3 di januari 2022.

Nos ta haci un suplica na tur nos clientenan pa tene cuenta cu e anuncianan aki y percura pa pidi pa servicio di Aduana na tempo pa asina evita cualkier inconveniencia. Nos ta pidi comprension y cooperacion di nos clientenan y partnernan.

Alabes nos ta desea comunidad di Aruba feliz dianan di Fiesta.







## OTRO AÑA SOUTHWEST AIRLINES LO TIN VUELO DIRECTO PA ORLANDO

Recientemente e aeroliña di Southwest a anuncia cambio den nan ruta cu nan ta ofrece pa Aruba entrante otro aña, asina Minister di Turismo Sr. Danguí Oduber ta duna di conoce. Southwest no ta un aeroliña desconoci aki na Aruba, ya nan tin varios aña caba bulando pa Aruba. Nan ta conoci pa ta un aeroliña hopi agradabel, amigabel pa bula cune y cu bon servicio.

Ta asina cu actualmente Southwest Airlines tin vuelonan diariamente pa Baltimore pero entrante 5 di juni di aña 2022 esaki lo cambia, nan lo cuminsa cu vuelonan diario pero for di Orlando. Segun e aeroliña esaki lo mehoranan coneccionnan den e mercadonan west y noord-oost di Merca.

Minister a señala cu pa nos localnan esaki lo ta hopi bon mirando cu lo tin mas vuelonan directo pa bay vakantie na e ciudad conoci pa e parkenan di atraccion manera por ehempel



Disney World. Por anticipa caba cuanto ta e famianan cu lo haci uzo di e vuelo aki pa bay Orlando e proximo vakantie escolar cu nan yiunan.

## COLOMBIA NO LO ACEPTA PASHENTNAN MAS CU NO TA VACUNA


Dia 14 di december AZV a ricibi informe di Colombia cu nan no lo ta tumando pashentnan cu no a vacuna mas pa haya cuido avansa. Pa e motibo aki Minister di Turismo y Salud Público Sr. Danguí Oduber ta haci un apelacion special na e comunidad di Aruba pa haci uzo di e oportunidad pa tuma nan vacuna.

E exigencia aki ta un decision cu Colombia mes a tuma como pais. Ta importante pa Aruba ta na altura awor di e exigencia aki y e consecuencianan cu esaki por tin. Esaki sigur por trece retonan grandi cune y por ta peligroso pa esnan cu ainda no a vacuna.

E vacuna ta keda duna resultado y gobierno ta urgi esnan cu ainda no a tuma esaki, pa tuma esaki mas pronto cu ta posibel. Walk-in pa vacuna na Centro Deportivo Betico Croes, na Santa Cruz a wordo extendi te cu dia 21 di December. Otro aña lo sigui duna vacuna y boostershot den luna di januari. Minister ta conseha tur hende cu no a vacuna pa haci esaki, e ta pa bo mesun salud.







## A REUNI CU ASOCIACION DI SIGURIDAD; ASIS DEN CUADRO DI ELEVA SIGURIDAD RIBA NOS ISLA



Recientemente, Minister di Husticia y Asuntonan Social Sr. Rocco Tjon a reuni y cera conoci cu e directiva nobo di Aruba Security & Integrity Services (ASIS) International Dutch Caribbean Chapter. Miembronan di e directiva nobo di ASIS ta consisti di Sr. Aaron Antersijn (Presidente), Sr. Marlon Richardson (Vice-Presidente), Sr. Urvin Werleman (Tesorero) y Sr. Robert Candelaria (Secretario). ASIS International ta un organisacion di seguridad internacional riba e tereno di maneho di seguridad cu centenares di departamentonan local rond mundo.

Durante e reunion aki, a toca e punto di colaboracion entre pais Aruba y e organisacionnan gubernamental y no-gubernamental, pa loke ta trata e standarisacion den e tereno di seguridad. Un di e visionnan ta pa bin cu cursonan y certificacion pa profesionalnan, caminda a traves di e transformacion di scol di polis den un Academia di Husticia, e parti aki por haya aun mas contenido conhuntamente cu ASIS.

Banda di esaki, kier mira mas "beleid" y "wetgeving" tambe riba e tereno di seguridad. Importante pa nota ta cu seguridad den e contexto aki no ta solamente seguridad fisico pero tambe "cyber



security". Tambe, a toca e tema di introduccion di protocol entre husticia y algun di e companianan di seguridad aki na Aruba, caminda ta trata di un colaboracion mas estrecho entre esakinan unda cu conhuntamente por combati criminalidad aki na Aruba. Segun e Mandatario, esaki tawata e prome di varios reunionnan na caminda unda cu lo enfoka riba un miho colaboracion.



# CRISIS TEAM Y DVG TA INFORMA CU 'WALK-IN' PA VACUNA DI COVID19 TA SER EXTENDI TE CU DIA 22 DI DECEMBER

Debi na e interes grandi bou di nos comunidad pa ricibi e 'boostershot', DVG ta informa cu a dicidi di extende e dianan di 'walk-in' na Centro Deportivo Libertador Betico Croes te cu diamars dia 21 di december for di 8or mainta pa 4or di atardi 'non stop' pa tur persona di 55 aña of mas. Den weekend Centro Libertador Betico

Croes lo ta sera y despues di dia 21 di december tambe e Centro lo ta sera te cu proximo aña.

Den luna di januari 2021 'walk-in' lo continua na Centro Libertador Betico Croes pero mas informacion lo wordo duna den e dianan cu ta sigui.



## HUNTO Combatiendo COVID-19

Laba man bon  
frecuentemente

Mantene minimo 1.5M  
distancia tur momento

Uza tapa boca  
paden di tur lugar

No duda.  
Vacuna!

Pa bo mes. Pa bo famia. Pa bo pais.



## Departamento di Salud Publico: UPDATE 16 DI DECEMBER 2021

Segun resumen di awe 32 persona a recupera y un total di 29 caso nobo di COVID-19 a keda registra di cual 6 ta no-residente. E cifranan aki ta representa un 'Positivity rate' bou di nos residentenan di 12%.

E cantidad di casonan activo di COVID-19 pa awe ta 231 y cantidad di fayecidonan relaciona cu COVID-19 ta 178. Datos ta ilustra casonan nobo di COVID cu un average semanal di

24 caso pa dia y un averahe di 'positivity rate' semanal di 16% pa dia.

Actualmente na Aruba tin 6 persona interna debi na COVID di cual den ICU tin 5 persona y riba piso general tin 1. Na Colombia tin actualmente 6 persona den ICU y ninguno (0) riba piso general.

16/12/2021	TOTAL	RESIDENTE	NO-RESIDENTE
<b>Casonan Nobo</b>	<b>29</b>	<b>23</b>	<b>6</b>
Activo	231	201	30
<b>Recupera</b>	<b>16307</b>	<b>14694</b>	<b>1613</b>
Positivo	16716	15069	1647
<b>Morto</b>	<b>178</b>	<b>174</b>	<b>4</b>
Vacuna	84081	-	-
<b>Hospitalisa</b>	<b>6</b>	<b>-</b>	<b>-</b>
AUA			
ICU	11	-	-
AUA COL	5 6		



**HABITONAN PA KEDA**  
*Saludabel*  
DEN TEMPO DI COVID-19 Y VACUNACION



MINISTERIO DE TURISMO,  
SALUD Y ASISTENCIA PUBLICA  
Y DEPORTE




### Prepara alimento den famia

Involucra bo yiunan den e preparacion di cuminda. Cushina por ta un bunita oportunidad pa comparti y promove habitonan saludabel den famia. Siña bo yiunan e balor nutritivo di cada ingrediente. Mostra nan e manera mas saludabel pa cushina cada producto. Mas bo cushina na cas cuminda nutritivo, mas saludabel bo lo keda. Pa combati COVID-19 bo mester mantene bo salud y vacuna, ya cu ta comproba cu e vacuna tin un efectividad halto pa proteha bo y evita transmision. Ban uza-tur e hermentnan cu nos tin pa caba cu e virus aki na nos isla!

**Ami SI ta vacuna!**





Mantene 1.5M minimo di distancia



Laba man frecuentemente



Uza tapa boca paden di tur lugar.

**VACUNA!**





*Un Feliz Dia*

**ISLA ONLINE**

NOTICIA DI GOBIERNO